

政秩然井然。不致有所紊亂也。先生晨起閱報。不以觀而以聽。報令識字之姬朗誦之。先生可以耳代目。亦生面別開之一端也。將出。令司巾櫛之姬盥漱櫛沐事畢。則登車至每日辦事處。如通商銀行華安公司等。遍蒞一週。返而交接賓客。或至各會場演說酬應等事。先生生平不嗜烟酒。公暇多在休息室中研究衛生之術。宜乎年逾花甲而鬚髮烏潤。能康強如少年也。先生元旦家宴。不雜他客。逢節開家宴。亦盛豐腆。先生肖子厚生君。亦長於中西文字。現爲漢陽鐵廠才料處坐辦。媳山西籍。爲前清某觀察之女公子。雍容能識大體。事翁姑亦甚和順。此先生家庭之樂事。實較尋常爲美滿十倍也。甬紳在滬負有鼎鼎之大名者。不過五六人而已。而先生實爲此五六人之一人。滬上各種善舉及公益事業。莫不有先生之名列入其間。屢爲人推作董事會長等。可想見其爲人任事實心。信孚中外。居家自奉。均有治法也矣。

徐雨之

童愛樓

前清香山徐雨之先生。諱潤。縱橫商界。馳騁宦途。歷六十餘年。事業聲望。彪炳中外。當時朝野人士。莫不欽慕。計其一生經歷。會辦輪船招商局。與唐景星觀察同事。集資開辦仁和水險公司。續設濟和火險公司。購旗昌洋行輪船馬頭棧房。需款二百五六十萬。由先生獨力籌謀。數日間。卒以成局。招商局基礎。賴以鞏固。李文忠極嘉勉之。時先生同鄉馮公。分巡蘇松太。照會先生。命會辦洋務交涉事件。奉直督李公札委津賑事。頗著勤勞。壬午。與從叔秋畦。榮甫。合辦同文書局。不惜重資。搜購古今書籍。廣刊行世。以惠學者。滬上書業之發達。實基於是。是歲七月。奉直督李公札委會辦開平煤礦。明年兼辦貴州煤礦。先生奉檄。南北馳驅。席不暇暖。入春自津返滬。築金

利源碼頭添置廣利富順兩輪。入秋吾國與法失和。法艦攻閩之馬江。我揚武兵輪擊斃法提督孤拔。法人慚憤。揚言集大隊海軍由太平洋出攻上海之製造局。風聲鶴唳。一日數驚。市面銀根緊急。周轉因以不靈。先生向日一切經營。幾乎一旦破裂。先生交好。皆代爲先生憂。而先生竟能履險如夷。坦然過去。迨至中法和議告成。乃一清理。恢復舊業。回首從前。渾然無迹。時劉壯肅巡撫臺灣。委先生辦理基隆礦務。先生子身渡臺。以水土不服而返。壬辰丙申間。先後奉直督李公札委總辦熱河建平平等處金礦。北洋大臣王。札委兼辦永平等處金礦。癸巳夏。由唐山出關。歷駐建平永平等各局。前後六年間。因唐景星觀察去世。襄助無人。竭盡勞瘁。是歲辦理開平唐山賑濟。亦盡心力。至今該地之人。尙有頌先生功德者。以上皆先生生平於商業一方面之偉大事業也。欲述先生家庭之出處。因不得不詳先生之履歷耳。至於功名家庭一方面。先生出山。乃援例捐員外郎。指分兵部。尋以轉運出力。得直督李公奏保。加四品銜。嗣由郎中改道員。指分浙江。又以署鄂督湖北巡撫翁公。於光緒建元江鄂漕糧海運出力。案內保奏。交部議叙。又二年。漕糧出力。經直督李公奏獎。加二品銜。給予從一品封典。前後蒙各督撫奏保。得秩至卿大夫。考先生爲人。義俠外亮。仁慈內蘊。志器宏遠。才識超恆。性剛直。重然諾。尤善懲遷。任事強毅。有堅忍不拔之態。雖在艱險。亦鎮靜如常。家居事親。以孝聞。父兄伯叔咸器重之。嘗曰。此吾家千里駒。異日光大門閥。必此子也。咸豐壬子。先生年十五。其叔榮村。挈之來滬。就學於蘇州閶門外之花埠里。不數月。先生乃謂數卷書。飢不可食。寒不可衣。讀之何爲。方今中外互市。世界競爭。非實業無以強國。非經商無以起家。乃毅然棄儒就賈。時乃伯鈺亭。方經理上海寶順行事。遂就之習絲茶業。公餘則習中西文。並與各專家討論實業。不十

年於滬上開設莊號五所。設寶源祥茶號。復專營地產業而驟富矣。丁丑。乃翁與太夫人六旬雙慶。適先生由郎中改道員。喜事重疊。賀客盈門。戊戌。先生年六旬。息勞居滬。諸子稱觴祝嘏。先生曰。欲起家宜經商。欲興國須實業。遂命子廷爵赴美。廷勳赴英。其餘先生一生事業及善舉。未能悉記。噫。如先生者。亦一偉人也。

胡雪巖

童愛樓

杭州胡雪巖。人均呼作胡大先生。名光墉。昔時爲浙江首富。宮室之美。埒於王侯。姬妾衆多。居處築十三樓。以貯之。極慾窮奢。盡人生之快意事。諸姬在胡母前請安。站立兩旁如百官上朝然。造大園林一所。數次翻築。始行定局。假山上蓄有真鹿。松皮石筍矗立無數。先生之母見之。訝曰。此何殊俗諺所謂刀劍山乎。當前清收還伊犁時。俄人多方要挾。關內外防營需餉正殷。協借迫不及待。旋又議給伊犁守費。餉力愈絀。山右陝豫等省。又報旱災。清廷正在羅掘俱窮之時。忽得先生一手所措華洋商款至千二百五十餘萬之巨。清廷得此。無殊涸轍得水。當蒙廷賞。予以極品。并賜黃馬褂及紫禁城騎馬。其家資無有能知其底細者。動云千萬而已。生平喜設當舖。計在湖州德清海甯嘉興石門杭州金華衢州蘇州鎮江湖北湖南共設當舖二十三處。資本金在二百三四十萬以外。又在各省設金銀等號。在杭州設胡慶餘藥鋪。使石崇鄧通復生於今日。亦當見而却步。其於善舉一方面。亦多有可述者。如錢江義渡難民局及杭州城陷時難中官民。苦無所歸者以千計。先生獨力開發火輪。四方接渡。造德亦匪鮮淺。攷胡大先生先世並非鉅富。其尊人在日家境亦甚窘迫。先生弱冠時棄儒學賈。初在某錢鋪作學徒數年。繼得故舊吹噓。荐入前清浙撫王中丞幕中。因其爲人誠謹。古道可風。中丞頗加青眼。由是扶搖直上。